

Broj: 07-26/6-2069/13
Sarajevo, 01.08.2013. godine

BOSNA I HERCEGOVINA
PARLAMENTARNA SKUPŠTINA
ZASTUPNIČKI DOM/PREDSTAVNIČKI DOM
n/r zastupnika, gosp. Boško Tomić

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 19-08-2013			
Organizaciona jedinica	Klasifikaciona oznaka	Redni broj	Broj priloga
01-	50-1-	15-10/13	

BOSNA I HERCEGOVINA
PARLAMENTARNA SKUPŠTINA
ZASTUPNIČKI DOM/PREDSTAVNIČKI DOM
n/r sekretara Zastupničkog doma ✓

PREDMET: Odgovor na zastupničko pitanje zastupnika – Boško Tomić
VEZA: Akt Predstavničkog doma Parlamentarne skupštine BiH
broj: 01/a-50-1-15-50/13 od 22.07.2013. godine

Poštovani,

Postupajući u skladu sa aktom Predstavničkog doma Parlamentarne skupštine Bosne i Hercegovine, broj i datum navedeni u vezi, koji se odnosi na dostavljanje poslaničkog pitanja koje je na 50. sjednici Predstavničkog doma održanoj 18.07.2013. godine postavio poslanik Boško Tomić, a odnosi se na postojanje pravilnika o zaštiti šuma od potkornjaka u Federaciji Bosne i Hercegovine i šta će se poduzeti na zaštiti četinaru, dajemo sljedeći

ODGOVOR

Oblast šumarstva je od 06.12.2011. godine u Federaciji Bosne i Hercegovine zakonski neuređena. Naime, presudom Ustavnog suda Federacije BiH od 14. aprila 2009. godine („Službene novine Federacije BiH“, broj 36/09), utvrđeno je da je tada važećim Zakonom o šumama („Sl. novine Federacije BiH“, br. 20/02, 29/03 i 37/04) povrijeđeno pravo općina na lokalnu samoupravu, te na osnovu iste se Zakon o šumama prestao primjenjivati sa 27.11.2009. godine.

Kao prelazno rješenje, do donošenja novog zakona o šumama, Vlada Federacije BiH je donijela Uredbu o šumama („Službene novine Federacije BiH“, br. 83/09, 26/10, 33/10 i 38/10). Novom presudom Ustavnog suda Federacije BiH broj: U-28/10 od 23.03.2011. godine („Službene novine Federacije BiH“, broj: 34/11), utvrđeno je da je Uredbom o šumama povrijeđeno pravo općine Konjic na lokalnu samoupravu jer Vlada Federacije BiH nije imala ustavni i zakonski osnov da Uredbom uređuje oblast šumarstva. Uredba o šumama, na osnovu predmetne presude, mogla se primjenjivati do 06.12.2011. godine.

Prestankom primjene navedenih propisa prestala je i primjena svih podzakonskih akata, između ostalih i onih koji su bliže uređivali oblast zaštite šuma od biotskih i abiotskih faktora.

U vrijeme važenja gore navedenih propisa gospodarenje državnim šumama je ugovorom preneseno korisnicima šuma (kantonalna šumsko-privredna društva). Za šumsko-privredna područja izrađene su i donesene šumsko-privredne osnove (desetogodišnji planovi gospodarenja) na osnovu kojih korisnici šuma donose godišnje

planove gospodarenja šumama. U okviru navedenih planova gospodarenja izrađuju se i planovi zaštite šuma.

Isto tako, na nivou svih kantona u sastavu kantonalnih ministarstava nadležnih za poslove šumarstva nalaze se kantonalne uprave za šumarstvo koje zajedno sa Federalnom upravom za šumarstvo čine izvještajno-prognoznu službu u oblasti zaštite šuma, a čiji poslovi i aktivnosti su bliže propisani odredbama Uputstva o vršenju izvještajnih i prognoznih poslova u zaštiti zdravlja bilja (Sl.novine Federacije BiH broj: 78/10), donesenog na osnovu Zakona o zaštiti zdravlja bilja ("Sl. glasnik Bosne i Hercegovine", broj: 23/03).

Imajući u vidu gore navedeno, vidljivo je da, iako trenutno nema propisa za oblast šumarstva na nivou Federacije BiH kao ni pravilnika o zaštiti šuma, korisnici šuma, Federalna i kantonalne uprave za šumarstvo, u skladu sa navedenim Uputstvom i planovima gospodarenja šumama prate zdravstveno stanje šuma i imaju obavezu poduzimanja potrebnih zaštitnih mjera.

Ovo Ministarstvo je, imajući u vidu štete nastale prije svega usljed šumskih požara naročito u toku 2012. godine (šteta u 2012. godini je višestruko veća u odnosu na raniji period - procjenjena direktna šteta iznosi 47.753.101 KM i ima elemente prirodne katastrofe), pristupilo izradi uredbe i programa o načinu utroška sredstava naknade za korištenje, zaštitu i unapređenje šuma a koja sredstva su u ranijem periodu u skladu sa gore navedenim Zakonom o šumama i Uredbom o šumama prikupljena u Budžetu Federacije BiH. Predmetnim propisima, ukoliko budu doneseni, finansijska sredstva bi se usmjerila na sanaciju nastalih šteta, pošumljavanje opožarenih površina i podizanje novih šuma na koji način bi se, između ostalog, spriječilo prenamnoženje potkornjaka i ublažile nastale posljedice ne samo usljed šumskih požara nego i posljedice nastale usljed dugog sušnog perioda tokom 2012. godine.

Potrebno je napomenuti da je ovo Ministarstvo u novembru 2011. godine Vladi Federacije BiH dostavilo Prednacrt Zakona o šumama, koji Vlada Federacije BiH još uvijek nije razmatrala, a u međuvremenu je podržala verziju Zakona o šumarstvu čiji predlagači su poslanici u Predstavničkom domu Parlamenta Federacije BiH Slaviša Šućur i Enver Mujala i isti uputila Parlamentu Federacije BiH na razmatranje i usvajanje. Obzirom da procedura razmatranja Nacrta Zakona o šumarstvu u Parlamentu Federacije BiH do danas nije završena, ovo Ministarstvo je u proteklom periodu u više navrata informisalo Vladu Federacije BiH o stanju u oblasti šumarstva usljed nepostojanja zakona o šumama u cilju hitnog donošenja istog.

S poštovanjem,



CO:

1. FMPVŠ – Sektor za šumarstvo i lovstvo;
2. FMPVŠ – Sekretar ministarstva;
3. Arhiva